

與方中信豹哥齊登「美魔男」半百子華謙稱唔夠型

黃子華繼早前被封為「高登男神」後，年逾50仍保養得宜的他，日前又再獲封「美魔男」。不過子華自嘲不夠型，笑言想試做facial轉「型」。

今年53歲的黃子華，日前與有「港版李察基爾」之稱的方中信及「豹哥」單立文等逾半百歲型男，一同獲封「美魔男」。昨日，子華一身西裝骨骨出席某周刊頒獎禮，獲頒慈善之星的他，表示有不少圈中人比他更有善心，不時捐錢興建學校，而他則義助「惜食堂」拍片，宣揚珍惜食物的信息。

捐錢起學校

對於獲封「美魔男」，他笑言不敢當：「我唔敢泊埋呢班型男，佢哋人又型，車又型，各方面都型，我唔係。」被問到自己欠缺些甚麼？子華續稱：「我又唔覺得爭啲咩，唔使個個都咁型，呢個世界有唔同類型嘅人才精采。不過如果你問我，我爭啲錢，想捐錢起學校。」

子華自言平時沒有刻意保養，被指天生麗質的他又笑言：「我都好恨做吓facial，我未試過。（叫女友幫你？）唔同嘅，啲啲專業人士會好大力幫你啣，乜嘢黑頭、白頭、黃頭都啣晒出嚟，唔知其他『美魔男』有冇做呢啲！」

視帝撐港視

提到男藝人艾威因香港電視未能開台而失業，更打算變賣家當**移民台灣**，子華表示：「唔止艾威，香港都好多人都覺得好氣憤，我個人都好氣憤，香港市民十個有九個都會覺得點解唔畀開台，我之前錄咗段片，話做人無公關就食屎，對成個香港係好差嘅公關，咁多人想有個選擇但又無得畀佢，相信好多人都會覺得唔舒服。」子華又指政府由第一日便應該要向市民交代：「成日話條例係咁，小市民點識呢啲條例，只係想有多個選擇啫！」

採訪：林常恩

攝影：Lego

編輯：陳禮恒